

AR VUHEZ - KRISTEN -



AVENUE DE LA MARNE

28

LORIENT



C/C. POSTAL N^o 209-81

SUR

NANTES

Koumanantchou

Koumananti a c'heller e pep amzer eus ar bloaz. — Skriva an hanoioù hag an adress fraez ha penn-da-benn ; ma n'eus bureo post ebet er gomun, lakat gant pehini e vez graet.

Koumanant ordinal :

6 l. ar bloaz.

Koumanantchou a enor

10 l. ar bloaz.

gant perz e 365 OFERENN (unan bemdez) a vez lavaret bep bloaz evit hor madoberourien.

N.-B. — Hol lennerien, m'o deus c'hoant, a c'hell dreizo o-unan rei frouez an oferennou-se d'o zud varo.

Adkoumanantchou

An neb a vez echu e goumanant, a vez kaset d'ezan dre ar post eur « MANDAT-CARTE » evit ma c'hello koumananti a-nevez. — Arabat eo d'hol lennerien gortoz ma vo kaset d'ezo eun « TRAITE POSTALE » evit PAEA, rak evel-se e kollont 4 lur HEP REZON VAT EBET hag e roont d'eomp eul labour DREIST-ORDINAL HIR HA POANIUS. Ni a gont war o aked ha war o bolontez vat evit paea dioustu.

TAOLIT EVEZ : lavarit atao petra 'zigasit d'eomp : EUN ADKOUMANANT pe EUR C'HOUMANANT NEVEZ ; ma tigasat asamblez adkoumanantchou ha koumanantchou nevez, DISPAR-TIA MAT ANEZO. — Evit eun adkoumanant, rei d'eomp an adress eun EVEL MA OA WAR AN NIVERENN DIWEZA ... ha ma 'z eo ret, goulenn da-c'houde chanj anezi.

Chanj adress

Evit chanj adress, digas d'eomp 1 lur e timbrjou gant an adress evel ma oa war an niverenn diweza.

Liziri ha skridou

An holl liziri ha skridou (koumanantchou, adkoumanantchou, pen-nadou-skrid evit ar gelaouenn, pedennou goulennet evit ar re varo pe intansionou all, keleier a bep seurt) a dle beza kaset da :

M. le Directeur de « Ar Vuhez Kristen »,
28, avenue de la Marne, Lorient, Morbihan.
C.-C. 209-81, Nantes.

Ha pa tle ar skridou-se beza embannet er gelaouenn, e tleont beza digaset d'eomp d'an diwezata D'AN 8 EUS AR MIZ evit beza embannet e niverenn ar miz war-lerc'h.



Er c'homzou-man bet lavaret gant Hor Salver Jezuz-Krist :
« Na gemerit ket aon rak ar re a laz ar c'horf »

I. SONJIT ERVAT : buhez ar bed-man a zo ken leun a zienez, a sempladurez hag a bec'hejou ma ne dleer ket kaout aon rak ar maro, a zeu da lakaat eun termen d'ezi ; ar skiant-vat a ya a-wechou betek ober d'eomp c'hoantaat mervel ; kuzul Mab Doue eo ma teufemp da zisprizout ar maro.

Gwelet al loened mut o kaout aon rak ar maro, n'eus ket da veza souezet, met c'houi hag a zo sklerijennet gant ho furnez ha gant an Aviel, penaos e c'helloc'h c'houi beza evelto ?

II. SONJIT ERVAT : Ar feiz kristen a c'hourc'hemenn d'eomp kredi ez eus eun eürusted vras divent ouz hor gortoz en Nenv ha ne c'hellomp da dizout nemet dre ar maro. Setu perak an abostol Sant Paol ha kalz tud santel o deus bet mall da vervel evit beza kentoc'h a-se unanet gant Doue. Poagnit da ren eur vuhez vat, ha n'ho pezo ket a aon rak ar maro, seul-vui e vezo mat ho puhez, seul nebeutoc'h a aon ho pezo razan.

II. SONJIT ERVAT : Hor Salver e-unan a zesk d'eomp keme-ret aon kentoc'h rak an hini a c'hell kas ar c'horf hag an ene d'an Ifern. An doujans Doue eo maen--diazaz ar furnez hag ar vertuz. Doujans Doue hag hi hepken a c'hell ho sikour da reizha hoc'h youlou fall, d'ober fae war ar bed, ho sikour da gabestra an diaoul. Pedit Doue eta da sanko doun an doujans-se en ho kalon, ha n'ho pezo aon mui rak netra.

— Lennit mat an dra-man —

E-touez ar re eo echu o c'houmanant

e miz Genver

ez eus c'hoaz hiniennou

hag a gendalc'h da reseo ar gelaouenn
ha n'o deus ket c'hoaz paet

evit 1933.

Poent bras eo hen ober !!

Evel m'eo merket war ar golo, an neb na fell d'ezan mui paea ar gelaouenn, a dle digas d'eomp en-dro an niverenn genta rak-tal gant ar c'homzou-man : *REFUSÉ*. — An neb a gendalc'h d'he reseo, a dle paea evit ar bloaz penn-dabenn.

Ar re n'o deus ket paet c'hoaz eta
evit 1933,

a dle hen ober hep-dale !

Bolontez vat eus perz an holl !

Da bep-hini e gont !

— Hag e vo mat pep tra ! —

Sellomp piz ouz ar Groaz

Naontek kant vloaz a zo, abaoe m'omp bet dasprenet gant H. S. Jezuz-Krist. Hon Tad Santel ar Pab hen digase da sonj d'eomp n'eus ket gwall-bell... Evesaomp eur pennadig ouz ar groaz ma voe staget outi, ha kutuilhomp unan pe unan eus ar c'henteliou kaer a ro d'eomp anezi.

Ar Sent holl o deus karet ar groaz. Alies n'o deus bet ken leor nemeti :

Hor Salver, eme Sant Jerom, *n'eo ket bet falvezet d'ezan ober leor ebet. Lezet en deus, evelkent, unan bet skrivet gant tachou soubet en e wad : Ar groaz... »*

Leor ebet talvoudusoc'h da lenn.

— E-pelec'h, e gwir, e tesker gwelloc'h anaout **KARANTEZ** an Ao. Doue en hor c'henver eget e tal ar groaz ? Ar merk brasa a garantez, daoust ha n'eo ket rei ar vuhez evit ar re a garer ? — Eo, eme Jezuz e-unan. Mat, hervez a lavar Sant Paol, *Jezuz en deus va c'haret betek mervel evidoun-me.*

Ar skrivagner bras Paskal en deus skrivet ar c'homzou kaer-man a lakae war muzelloù Jezuz :

« Sonjal a raen ennout em Pasion hag evidout em eus skuilhet ar berad-man-berad eus va gwad. »

Fazia a rae evelato, rak n'eo ket eur veradenn eus e wad hepken eo en deus skuilhet evit pep-hini ac'hanomp, met e holl wad.

Daoust ha n'eo ket aze ar pez a lavar d'eomp ar groaz ?

Penaos gellout chom neuze dizeblant ouz eun hevelep karantez ? Siouaz, evel ma lavare Sant Fransez gwechall, a zo gwir c'hoaz :

« Ar garantez n'eo ket karet. »

— E-pelec'h e tesker gwelloc'h anaout **TALVOUDEGEZ HON ENEOU** eget e tal ar groaz ? An traou a dalv peurvuia ar pez o deus koustet. Petra o deus koustet da Zoue an nenv hag an douar ? Nebeut a dra : eur gomz hepken, ar gourc'hemenn da zont eus a netra.

Petra o deus koustet eta. Hogen, seul-vui ma talv eun dra, seul-vui a boan a dleer da gemeret d'he mirout, neketa ? Perak neuze e vez kavet kement a gristenien diskiant hag a zizonj a-grenn pegen bras talvoudegez o deus o eneo ha pegen ret eo d'ezo o miret disklabez, o savetei ?

— E-pelec'h e tesker gwelloc'h anaout **BRASDER, GREVUS-
TED AR PEC'HED** eget e tal ar groaz ? Evit digol Doue eus an enor lammet digantan dre ar pec'hed, e Vab muia-karet en deus ranket diwaska ar poaniou skrijusa. Gouzout a reomp pere int. Na



leveromp ken neuze eo ar pec'hed eur pezh kaer, rak gwasas tra a zo er bed eo.

—E-pelec'h e kaver gwelloc'h DIDORR EN HOR POANIOU eget e tal ar groaz ? Eur beleg, eun dervez, a yeas da welet eur c'hlanvour.

Spontus e oa ar pezh a c'houzanve. Habask, diglemm, laouen zoken e oa. Souezet, ar beleg a c'houlenn digantan :

« Poan hoc'h eus, va mignon ? »

— Ya, emezan, hag en eur ziskouez d'ezan ar c'hrusifi stag harp ouz e wele : met, Hen, en deus bet da c'houzanv muioc'h egedoun. Sellet a ran outan, e bedi a ran, ha kerkent e vezan frealzet. »

O vervel war ar groaz en hol lec'h, Jezuz en deus gwalc'het hor pec'hejou ha dasprenet evidomp ar gwir da gaout perz en e Varadoz. Fizians a c'hellomp da gaout eta e madelez an Ao. Doue. Eur plac'h yaouank a oa dare da vervel. Kovesaet he doa he fec'hejou gant gwir c'hlaç'har, hag a greiz pep kreiz e tirollas da lenva en eul lavaret :

Emaoun o vont da vervel ha va daouarn a zo goulo ».

Diwan a reas eur sonj kaer e spered ar beleg. Lakaat a reas etre he daouarn eur groaz :

« *Bezit dinec'h breman, va merc'h, holl veritou J. K. a zo d'eoc'h.* »

Ar c'homzou-se a lakeas ar peoc'h da ren en he c'halon, hag e varvas en eur starda c'houek ar groaz war he muzellou.

TREMEUR.

Pedomp an eil evit egile

Setu aman an intansionou a zo bet digaset d'eomp er miz tremenet, ar re varo a zo bet goulennet pedennou evito, ha hanoiu hor madoberourien. Ni hor bezo sonj anezo en hon oterennou hag en hor pedennou, ha goulenn a reomp ivez digant hol lennerien pedi evito.

INTANSIONOU : eur ganedigez ; va amzer-da-zont ; tud dilabour ; konversion va gwaz ; yec'hed eur beleg yaouank ; mision ha retrejou ; eun den klanv.

HON ANAON : Janed Mari Péresse, Mari Juliana Renaud ; Mari Juliana Guillo, S. Avé ; Mari Jozef Capitaine, Itr. Jacqueline Belgique, Languidic ; Itr. G. Le Baut, Itr. G. Le Doaré, Itr. Labastire, Ao. G. Avan, Kastellin.

Ar re-holl o deus skignet ar Vuhez Kristen pe digaset d'eomp koumanantchou a enor.

Digareziou !...

PA VEZIN DEUT DA VEZA KOZ...

« O ! bezit dinec'h, Aotrou, pa vezin deut da veza koz, ez in bep sul d'an oferenn, e sentin penn-da-benn ouz lezennou an Aotrou Doue ha re an Iliz. P'am bezo graet va fortun, p'am bezo bet va retred, va c'hredit e gwirionez, ne vezo ket gwelloc'h kristen ege-doun-me.

— HA DA C'HEDAL ? Da c'headal e vezoc'h D'AN DIAOUL.

— D'an diaoul ? Asa-ta ! me a gar an Aotrou Doue ; ne vezin ket eun den fall evit kement-se...

— An neb n'eman ket ganin, a zo enep d'in, en deus diskleriet Hor Salver. Ouspenn, hon holl oberou a zo mat pe fall ; gounit a reont evidomp pe ar baradoz pe an ifern.

Evel-se, ho puhez a-bez koulz lavaret a vezo d'an diaoul, hag AR RESTACHOU a vezo kinniget DA ZOUÉ ?

HA NEUZE MA NE ZEUIT KET DA VEZA KOZ ?

Rouez eo an dud koz e-kenver ar re a varo yaouank hag e-kreiz o nerz.

A-hend-all, ne gemerit ket kennebeut an tu-mat da veza koz, rak an dizurziou a bep seurt a gas abretoc'h ar c'horf d'ar vered.

Ya, gwir eo, an Aotrou Doue a zo mat, met a-wechou e teu da skuiza : Ar Spered-Santel ne gar ket e vefe daleet re da senti ouz e vouez.

N'eo ket mat kas d'an dervez war-lerc'h ar pezh a c'hellomp hag a dleomp ober en dervez hirio.

Met lakeomp e teuoc'h da veza koz, lakeomp ivez e teuoc'h da c'hellout beva war o leve, graet ho fortun ganeoc'h, HA KAOUT A RA D'EOC'H E VEZOC'H NEUZE AR PEZ A LAVARIT : EUR C'HRISTEN MAT, hag e sentoc'h penn-da-benn ouz lezennou Doue ha re an Iliz.

An den yaouank, a lavar d'eomp ar Skritur-Sakr, a ya gant an hent a vez desket d'ezan en e vugaleaj, ha deut war an oad, e kendalc'ho gant ar memes hini.

Kement-se a ya da lavaret : AR PEZ OC'H EZ YAOUANK, E VEZOC'H IVEZ EN HO KOZNI.

Eun cil natur ho pezo gounezet end-eun, ar c'hustum, galvet c'hoaz eur roched-houarn, n'heller mui peurliesia he diwiska.

Penaos e teufec'h da veza eun den a vertuz war fin ho puhez, goude beza bet a-hed hoc'h amzer eun den a bec'hed hag a dechou fall ?

Ar Sent o-unan, dreist-holl ar re o deus pec'het bras e-pad o buhez, o deus bet da stourm en eun doare spontus evit ren eur vuhez santel.

Na c'hortozit ket eta eur gozni ha na zeuio morse marteze, eur poënt ma vezo diaes-meurbet d'eoc'h dizrei ouz Doue.

Nann, NA C'HORTOZIT KET, met hirio rak-tal lavarit gant ar mab-prodig : « Sevel a rin, ha mont a rin da gaout va Zad. »

HIRIO !... RAK-TAL !...

BROGAROUR.

Pajenn an Unvaniezh katolik

PAOTRED AN DIVREC'H KROAZET...

E-kichen PAOTRED AN DAELOU, a vez atao oc'h en em jala hag o tiskleria n'eus netra d'ober evit mirout ouz ar relijion da veza dispennet, ez eus eur rummad katoliked all hag a c'hellfed ober anezo : PAOTRED AN DIVREC'H KROAZET.

Ar re-se ivez a lavar n'eus netra d'ober, mat n'eo ket en hevelep doare.

Evit an dud-se, ar relijion n'he deus d'en em glemm ouz netra :

« Met petra c'hoarvez ganeoc'h ? emezo d'ar re-all ; Daoust hag hen n'hon eus ket hol liberte evel an holl ? Ma fell d'eomp mont d'an iliz, den ebet ne vir ouzomp da vont di ; ma fell d'eomp pedi, e c'hellomp hen ober ; ar skoliou libr a zo digor d'hor bugale ; ar relijiused a zo lezet e peoc'h. E gwirionez ne welomp ket ouz petra hor befe d'en em glemm.

Gwir eo, bez 'ez eus bet e penn ar gouarnamant tud hag a felle d'ezo diskar ar relijion. Met hirio n'eman mui an traou evel-se. Chomomp eta e peoc'h ! »

Setu aze penaos e komz an dud-se.

Paour-kaez tud dall ! Met petra ranko eta c'hoarvezout en hor bro evit digeri d'eoc'h ho taoulagad ? Selaout :

En hor bro Frans, an holl e c'hell en eur glevout, en em voda evit labourat aesoc'h ha gwelloc'h... AN HOLL... NEMET AR RELIJIUSED, ha ma n'int ket laket er-maez eus ar vro, eo abalamour n'en deus gallet ar gouarnamant hen ober ; HA C'HOUI A LAVAR N'HON EUS D'EN EM GLEMM OUZ NETRA ?

En hor bro Frans, an holl, gant m'o devo bet o diplômu, a c'hell ober skol... AN HOLL... NEMET AR RELIJIUSED, n'eus forz pegen desket e c'hellfent beza. HA C'HOUI A LAVAR N'HON EUS D'EN EM GLEMM OUZ NETRA !

AN HOLL A BAE kargou, AN HOLL IVEZ A DLEFE KAOUT PERZ en arc'hant-se. Hogen sellit ouz ar skoliou. Petra 'vez roet d'ar skoliou kristen, n'eus forz pegement a vugale a vefe enno ? NETRA. An arc'hant a ya holl gant ar skoliou dizoue, ha pa ne vefe koulz lavaret bugel ebet enno. HA C'HOUI A LAVAR N'HON EUS KET D'EN EM GLEMM !

An deskadurez dizoue roet d'ar vugale, ar lezennou diaoulek, evel lezenn an divorz, o deus hanter-vouget ar feiz er vro ; ha

c'houi a gav d'eoc'h n'hon eus ket d'en em glemm; ha c'houi a sonj d'eoc'h e c'hell eur gwir gatolik, karantez d'ezan evit e feiz, chom kroazet e zivrec'h gantan, e-pad ma 'z eus deputeed difeiz ha mistri-skol komunist, hag all, o laza ar relijion — hor relijion santel !.. en hor bro.

Nann, paour-kaez tud dall, kredit ac'hanoun, n'eman ket an amzer da gousket; ar c'hontrol eo : poënt-bras eo d'eomp SEVEL PLOMM — holl asamblez — evit harpa hor feiz ha youc'hal a-bouez penn e fell d'eomp kaout hor gwiriou... HON HOLL GWIRIOU... PENN-DA-BENN... EVEL AN HOLL !..

ANEZ-SE gwas-a-se evidomp.... ha gwas-a-se ivez evit hor bro !..

CHOM GANEOMP !

*Chom ganeomp, o Jezuz, rak amzer drist a ra,
Hag en-dro d'eomp e kren pep tra ;
Ar gurun a c'hrosmol, hag a-hed an oabl rouz,
En em astenn gwagenn e droug.*

*Chom ganeomp, o Jezuz, an traou a ya a-dreuz ;
A bep tu d'eomp dispac'h ha reuz ;
Ha betek hor skouarn, askel an avelioug
A zoug ekleo ar brezelioù.*

*Chom ganeomp, o Jezuz, ar poblou o deus aon,
War o dremm eman liou an naon ;
Bugaligoù a lenv etre diwrec'h o mamm,
Hag a vara n'eus ket eun tamm !*

*Chom ganeomp, o Jezuz, dinask eo ar pec'hed,
Ar gwall-dechou o deus sec'hed !
Ha dounoc'h-doun, bemdez, an dud, betek o goug,
A ziskenn e feunteun an droug.*

*Chom ganeomp, o Jezuz, hag harpet gant da vrec'h
D'hon enebour ni a vo trec'h ;
Ha kalonou da bobl, evel parkou bleuniet,
Gant da beoc'h a vezo leuniet.*

*N'eus gouest den nemedout da chanj doare d'ar bed,
Chanj doare d'ezan, ni da bed ;
Ha laka da vouz'hoarz, 'vel ar werelaouenn,
Da bara war hon tal laouen.*

Evit beza salvet... eo ret anaout

AR MISTERIOU, SKLERIJENN E-KREIZ
TENVALIJENN AR BED-MAN.

E-kreiz an noz tenval, ken tenval hag en eur forn, eun den a zo o kerzout dre eun hent striz ha doun evit mont d'ar gêr.

En em gaout a ra gant eun tachad hag a zo ennan eun « torr-gouzoug », eun islonk a bep tu d'an hent. Penaos e raio evit treuzi an tachad-se hep droug ? Ne wel netra dirak e zaoulagad...

Ha setu eun tarz kurun o strakal, eul luc'hedenn a strink he sklerijenn hag a ziskouez en eun taol d'ar c'haez den dre belec'h tremen evit mont a-biou d'an « torr-gouzoug »...

Skeudenn ar gristenien, a zo ivez, er bed-man, o vale war eun hent striz, doun ha tenval, war-zu ar gêr... war-zu o gwir vro... war-zu an Eternite. A bep tu d'an hent ez eus toullou doun, hag eun « torr-gouzoug » aman hag a-hont.

PIOU A DAOLO SKLERDER EN DENVALIJENN-SE, ma c'hello an den gwelout an danjer ha diouall dioutan ?

AR RELIJION, GANT HE MISTERIOU.

Hi eo a sklerijenn an hent a gas d'an Eternite ; dreizo e wel an den ar wirionez kuzet.

Penaos an dra-se ?

Evit skouer, lennit an dra-man ha gwelit.

1° — An dud faziet, hag a glask ar wirionez gant bolontez vat, a vez alies strafuilhet o sonjal pegen truezus eo buhez an den war an tamm douar-man.

« Mar deo mat an Aotrou Doue, emezo, perak ivez eo ken maleürus an dud er bed-man ha perak o deus poan. »

Setu eur skoasell war hent an Eternite, eur goumoulen denval hag a stank an hent.

Piou a daolo sklerijenn e-kreiz an denvalijenn-se ? Ar Relijion gatolik gant MISTER AR SILVIDIGEZ :

N'eo ket an Aotrou Doue eo en deus lakaet an den da veza maleürus. N'eus nemet an dud eo a vez penn-abeg d'an dra-se. An den a zo bet krouet evit beza eürus er bed-man hag er bed all. Met en em savet eo bet enep da Zoue ; dismegans en deus taolet war e Justis dre e bec'hejou ha kollet en deus dre-se e vadou.

Doue, koulskoude, n'en deus ket dilezet an den goude e bec'hed, evel m'en deus graet d'an Elez fall. Gounit a c'hell c'hoaz ar Baradoz, ma kar lakaat e boan ; poan avat a rank da gaout ; ha setu perak eo maleürus war an douar, rak dre ar boan ha dre ar binijenn

hepken eo e tigollo Doue eus an dismegans en deus taolet warnan dre ar pec'hed.

2° — « Met, eme adarre an dud faziet, mar deo ker kablus ha « ken karget a zle e-kenver Justis Doue, birviken ne c'hello paea e « zle, goude ma rofe kant gwech e vuhez evit kement-se : rak an « den a zo ken dister, ha Doue zo ken bras. Holl vadou ar bed-man « n'int ket evit digoll ar Justis Eternel ofanset dre ar pec'hed. »

Gwir bater eo kement-se.

Ha setu eur mister all o splannaat evel eul luc'hedenn hag o teurel sklerijenn e spered tenval an dud faziet :

Doue e-unan, dre vadelez, en deus sammet war e ziouskoaz pec'hejou an den ; maro eo war ar groaz evit digoll penn-da-benn Justis Doue hag evit kaout pardon an den, hag an dra-se eo **MISTER AR REDEMPTION**.

3° — Eun Doue maro ?? a lavar neuze an hevelep tud ; kement-se ne c'hell ket beza gwir. « Doue ne c'hell ket mervel, pegwir eo Eternel. »

Gwir eo. Ha setu c'hoaz eur mister all o tarza evel eun taol kurun, hag o splannaat evel eul luc'hedeun evit skarza an denvalijenn.

Evit kaout an tu da vervel war ar Groaz, evit savetei an den ha paea e zle da Justis an Aotrou Doue, Mab Doue en deus kemeret natur eur paour, natur an den : ha kement-se eo **MISTER AN INKARNASION**, hag evel-se en deus gelllet mervel evel den, n'eo ket evel Doue.

4° — « Neuze ez eus eta daou Zoue ? — Doue e-unan hag e Vab ? » a lavar adarre an dud faziet.

Ha setu eur mister all o para evit skarza eus o spered an denvalijenn.

N'eus nemet eun Doue. Met e Doue ez eus tri Person ha ne reont o-zri nemet eun Doue hepken. Ha setu **MISTER AN DREINDED**, mister ar misteriou, ar brasa a zo, an hini a daol sklerijenn war an holl visteriou all.

Panevefe ar mister-se, ne vefe gelllet kompren netra e Mister an Inkarnasion, e Mister ar Redemption nag e Mister ebet.

Breman, sur a-walc'h, m'o deus an dud-se bolontez start da anaout ha da gaout ar wirionez, e lavarint :

« Mat evelato, mar deo gwir an dra-se, nag eun dra vras, eun « dra uhel ha kaer ha talvoudus eo eta ene an den, pegwir eo bet « ret da Vab Doue, evit e savetei ha paea e dle e-kenver Justis « Doue, skuilha e wad ha mervel war ar Groaz ! »

Setu penaos, hed-a-hed an hent tenval ha digompez a gas d'an Eternite, e kav an den **SKLERDER, NERZ, FREALZIDIGEZH HA LEVENEZ GANT MISTERIOU AR RELIJION GATOLIK**, ma venn atao kemer poan d'o anaout evel m'emaint.

B. K.

Ar c'hommunist yaouank

E 1871, e Pariz, goude ar brezel gant ar Prus, e voe freuz bras, rak hailhoned fall, ar gommunisted, a glaskas beza ar vistri er vro, hag evit dont a benn eus o zaol, e lazent an dud pinvidik, e lakent an tan en tiez. Ret e voe kas ar soudarded wella evit beza trec'h d'ezo. Paea a rajont o zaoliou fall, rak kement hini a veze kavet gant armou en e zourn, a veze kondaonet d'ar maro.

Eun paotr yaouank, pevarzek vloaz, a voe digaset dirak ar c'holonel Desgrands evit beza barnet. Gouzout a rae petra a c'hoarvezfe gantan, rak armou en doa douget e arme ar gommunisted. Met a-raok beza barnet, e lavaras d'ar c'holonel, e komzou dereat :

« A-raok rei urz d'am laza, roit d'in aotre, mar plij, da gas va c'hoar vihan da di Leanezed ar Garantez. Al leanez he deus louzaouet va mamm, p'edo klanv, a c'hantae kas ganti va c'hoar vihan, Paolin. Met me, ne felle ket d'in. Breman, avat, p'emaoun o vont da vervel, va c'hoar ne c'hell ket chom he-unan. »

Ar c'holonel a sellas gant evez ouz ar c'hommunist yaouank, rak n'en doa ket a zoare da glask trei geier, hag e zremm a oa dremm eun den onest :

« Perak, eme ar c'holonel, out bet tapet gant eur fuzuilh en da zaouarn ?

— Ar gamaraded, kolonel, a lavare d'in e oa ar soudarded hag ar re binvidik enebourien ar bobl, hag e oa ret o diskar. Gwelet a ran oun bet tromplet ganto. Met gwaz-a-se evidoun. Ma roit d'in aotre da vont da welet va c'hoar, me a ro d'eoc'h va ger e vezin distro a-benn eun hanter- eur. »

Goude beza komzet eur pennadig ouz an ofiserien a oa en e gichen, ar c'holonel a lavaras :

« Mont a c'hellez.

— Trugarez d'eoc'h, kolonel. »

« Setu aze unan hag a zo saveteet », a lavaras ar c'holonel en eur c'hoarzin, hag e kendalc'has da varn kommunisted all.

Edo echu ar varnedigez, pa voe gwelet o tont er sal ar paotr yaouank a bevarzek vloaz, e zourn krog e dourn eur baotrezig a zek vloaz pe war-dro hag a oa eul lienenn en-dro d'he zal.

« Kolonel, emezan, diwezat e tigouezan, rak va c'hoar Paolin a zo bet stoket eur c'harr outi hag a zo kouezet war ar vein, hag em eus ranket he c'has da di an apothiker. Ha va lezel a rafec'h c'hoaz da vont da di al Leanezed gant va c'hoar ? »

Ar c'holonel en doa bec'h oc'h en em viret da lenva :

« Va migon, emezan, kont d'in istor da vuhez. Ar varnerien a zo aman en-dro d'in, o devezo kement a blijadur ha me ouz da glevet.

— Va istor, kolonel, n'eo ket hir. Va zad a oa kabiten war eur

vag-marc'hadourez, hag a zo maro o klask savetei ar mous kouezet er mor. Hen eo a c'houneze bara d'eomp. Goude e varo, va mamm he deus ranket labourat re hag a zo kouezet klanv. An holl arc'hant a oa en ti, a zo aet da brena louzeier, met kaer 'zo bet ober, va mamm ne wellae ket. Al leanez Ameli a zo bet war he zro e-pad pell amzer, met va mamm a zo bet sammert gant ar maro.

Hag e voe gwelet daërou o tont neuze e daoulagad ar paotr :

« Heman, eme ar c'holonel, n'eo ket eus ar memes danvez hag ar gommunisted all a zo bet barnet d'ar maro. »

Hag e lavaras d'ar paotr :

« Selaou. Te ne vezi ket kondaonet d'ar maro. Da c'hoar ha te a gavo lojeiz em zi-me, ha me a veilho warnoc'h hiviziken. »

— Ha ni ho sikouro, a lavaras an ofiserien all en eur vouez....

D'ar c'houec'h a viz genver 1881, gouel ar Rouaned, e ti ar jeneral Desgrands, edod ouz taol, o c'hedal ar mare da ranna gwastell ar Rouaned. Ar beleg nevez n'oa ket en em gavet c'hoaz. Rak-tal e tigoras an nor, ha setu-hen, an aotrou Laverne, laouen holl hag eürus. Hen eo ar paotr 14 vloaz a oa bet gant ar gommunisted. Kaset d'ar skolaj gant ar c'holonel Desgrands, setu-hen deuet da veza beleg. He c'hoar a zo ivez ouz taol, hag a zo ken eürus hag he breur. Hi ivez en em roio da Zoue hag a vezo Leanez evit sikour an dud klanv, an dud poaniet.

Met an eürusa marteze e oa ar jeneral Desgrands, hag hen disleria a reas, pa rannas ar gwastell.

« Ho trugarekaat a ran ho taou, emezan, eus ar joa santel hoc'h eus digaset em zi. N'em eus bet morse rebech ebet d'ober d'eoc'h. Karet em bije ho terc'hel em c'hichen atao. Met pegwir en em roit da Zoue, oun laouen. Gouzout a ran e c'hellin konta war ho pedennou. »
Y. U.



Grit ho Pask !!...

Sonjit mat en-dra-man :	Hep-dale eta e vezo ho tro
bemdez e varv 140.000 den ;	da vont dirak lez-varn Doue.
C'houi a varvo ivez hep-dale ;	Bezit eta prest !
rak ar vuhez-man a zo berr ;	Evit beza prest, bevit er stad a c'hras ;
Unan hepken diwar gant	Evit kaout ar stad a c'hras,
a ya dreist 65 bloaz.	Grit ho Pask.

HA GOUDE-SE,
KENDALC'HIT ATAO WAR AN HENT MAT !!
BETEK HOCH EUR DIWEZA !!

Komzou Bernadet Soubirous

D'an 11th a viz C'houevrer diweza, ez eus bet graet e Lourdes eur gouel dispar evit envori ar 75th bloavezh m'en em ziskouezas ar Werc'hez Vari evit ar wech kenta da Vernadet.

Ar Plac'h-Eürus-man, gwelet ha klevet ganti an Itron-Varia, ne glaskas a-hed he buhez nemet chom e peoc'h, pell diouz an trouz, ankounac'haet gant an holl. Setu aman, koulskoude, eun nebeud a c'heriou kouezet eus he muzellou.



« Eun devez, eme eul leanez, e tiskouezis da Vernadet eur skeudenn eus Grot Lourdes, hag hi ha lavarout d'in : Petra a vez graet gant eur skubellenn ? — Peseurt goulen !... Met skuba, emichans. — Ha goude ? — Goude e vez laket en he flas. — Mat, e-pelec'h eman plas ar skubellenn ? — E feiz, en eur c'horn, a-drenv an nor. — A ! setu va buhez-me. Ar Werc'hez he deus en em servijet ac'hanoun ; ha neuze oun bet laket en eur c'horn. Va flas eo ; eurus oun eno. »

Eun devez all e lavare : « Petra a sonjit-hu ez oun-me ? N'ouzoc'h ket marteze ez oun bet choazet gant an Itron-Varia, dre ma oan ar sota ? M'he dije kavet

unan bennak sotoc'h egedoun-me, hounnez a vije bet kemeret ganti ».

Sonjal a rae d'ezi he doa penn kalet : « N'oun biskoaz doujus ; setu perak ez oun bet kastizet gant ar Werc'hez, pa c'houlennas diganin, teir gwech dioustu, pe hano am boa. »

Eur misioner eus Garezon a lavaras d'ezi : « Prometet ez eus bet d'eoc'h digant ar Werc'hez beza eürus er bed-all, gellout a rit eta beva dinec'h breman. — O ! O ! Aotrou, ganeoc'h-hu e kerz an traou !... Eurus e vin, ya ; met, gortozit ! Ma ran va dever, ha ma kerzan dre an hent eeun ! »


Ruzia a reas, eun devez, gant ar vez, pa zigouezas d'ezi anzav, hep sonjal, e voe bet lavaret d'ezi « C'houi » gant ar Werc'hez.

Enebourien Vernadet a fallgalone buan, rak chom a rae atao laouen ha leun a basianted : « Setu, emezi, ar pez am eus gwelet hag ar pez a ouzon ; ma ne fell ket d'eoc'h kredi, petra ken a rin-

me ? » Pe c'hoaz : « Karget oun bet da lavarout d'eoc'h an dra-se, met nann d'ober d'eoc'h her c'hredi. »

D'ar beleg deuet a-berz an Aotrou 'n Eskob d'ober eun enklask hag aet ganti d'ar Grot, e respontas braoc'h c'hoaz !... Selaout : « E teuit, va merc'h, da lavarout d'eomp-ni ho poa debret eun tamm yeot d'ar mare ma voe bet kavet ar vammen. Perak an dra-se. ? — N'ouzon ket : graet em eus kement-se war goulenn an Itron. — Met n'eus nemet al loened hag a zebr yeot kriz. — O ! n'eo ket gwir, aotrou... Ni, ivez, a zebr saladenn griz,... gwir eo, lakat a reomp ganti eur banne eol hag eul lomm gwinegr... »

D'eur beleg hag a c'houlenne diganti touch traou a zevosion deuet gantan, e lavaras a vouez uhel : « D'eoc'h-hu eo d'am benni-ga, ha nann d'in-me. »



Kalon Vernadet a oa distag diouz traou an douar. Eun devez ma voe bet roet d'ezi gant eur familh eur chapeled a briz, hi ha lavarout d'unan eus an dud-se : « Dimezell, pegwir ez eo ar chapeled-man d'in-me, me her ro d'eoc'h ; kemerit-hen ganin ; mirit-hen ; ar blijadur a c'hellit ober d'in, eo hel lavarout alies evit ho kerent ha va re-me. » Evel ma talc'he ar familh ganti : « Dimezell, na chomit ket pelloc'h, me ho ped, hep rei d'in ar joa a c'houlennan diganeoc'h. »

Unan bennak a c'houlenne outi :

— Eus petra hoc'h eus ar gwella sonj ? Eus deiz ho Pask kenta, pe eus an deiz m'hoc'h eus gwelet ha klevet ar Werc'hez ? » Hag

hi da respont gant furnez : « N'ouzon ket ha ne ouzon... An traou-se a ya an eil gant egile, ha n'hellont ket beza laket kenver-ha-kenver. Ar pez a ouzon, eo ma 'z oun bet eürus an diou wech-se. »

Pa guitaas Lourdes evit mont da Nevers, eul leanez a lavaras d'ezi, evit rei d'ezi konfort, e tegemer ar Werc'hez e pep lec'h ar pedennou : « O ! ya, her gouzout a ran, met e Lourd, er Grot e oa va baradoz. »

— Ha brao e oa ar Werc'hez, e voe goulennet diganti. — Ken brao !! Ya, ken brao ma n'heller mui karout netra war an douar, pa vez bet gwelet eur wech. »

Kaout a rae displead labour ar vicherourien a rae skeudenn Itron-Varia Lourdes :

« Nag eo divalo labour an dud-se, va Mamm vat ! Pa ho kwelint... na pegement e vint tapet ! »

He Superiorez, deuet d'he gwelout e-pad he c'hlenved, a lavaras d'ezi : « Petra a rit-hu aze, tra didalvez ? — Ober a ran va labour, mamm gaez. — Ha pehini ? — Beza dalc'het gant ar c'hlenved. »

Anaout a reer ivez eur ger kaer lavaret ganti war he zremenvan : « Eurusoc'h oun em gwele, gant va C'hrist, eget n'eo eur rouanez war he zron. »

A-walc'h eo. Gwelout a rit petra he deus graet gras Doue e kalon hag e spered ar verc'hig-man ken dizesk ha ken simpl. He c'homzou a zo atao reiz ha gwirion, atao mat ha fur, henvel ouz komzou Janed a Ark dirak he barnerien. Gant eur mousc'hoarz hag en eur ober a-wechou eun tammig goap, e lak ar wirionez da splannaat, evel ma strimp gant eur maen a gouez, an dour tro-war-dro. Ha kement-man a ziskouez sklaer ez eo bet Bernadet, er memes amzer, eur bugel da Vari hag eur bugel da vro Frans.

N'eo ket a-walc'h ! !...


Evit kaout ar pardon eus ar pec'hejou,
N'eo ket a-walc'h kofes ha komunia...
Ret eo ouspenn kaout keuz d'ar pec'hejou
Gant eur volontez stard ha gwirion da chanj
evit an amzer-da-zont.

Ar beleg a c'hell beza tromplet...
Doue n'hell ket ! !

Dalc'hit mont sonj eus a-gement-se


GRIT HO PASK ! !... MET GRIT MA HO PASK ! !...

Pa vezoc'h gant eun dra,
troit mat en-dro d'ezi —
klaskit, sonjit, furchit mat e pep korn anezi,...



....Met, en han' Doue, na dorrit ket ho penn

EVEL HEMAN !!!



Ar C'horreiz

I. — PETRA EO ?

Evit eul lodenn dud, ar C'horreiz a zo eun amzer damhenvel ouz an amzeriou all. Eul lodenn all ne wel er C'horreiz nemet deveziou meurlajez.

Evit ar gristenien, ar C'horreiz a zo eun amzer a *bedenn*, eun amzer a *sonjezonou santel*, hag eun amzer a *binijenn*.

Abaoe ar penn-kenta eus an Iliz, ar gristenien o deus yunet ha graet vijil d'ar merc'her-ludu betek Pask evit derc'hel sonj eus an 40 devez yun tremenet gant Hor Salver en dezerz a-raok mont da brezeg an Aviel. Pask eo ar gouel bras; rei a ra d'eomp eur vuhez nevez hag eur bromesa da sevel ivez eus a varo da veo. Met evi-domp-ni, bugale Adam, n'eus ket a vuhez hep pinijenn; ne vezimp ket henvel ouz Hor Salver, ma ne zilezomp ket hon techou fall : « Ma varvomp gant Jezuz-Krist, a lavar sant Paol, e vezimp ivez gantan; ma c'houzanvomp gantan, e renimp ivez gantan. » Penaos beza santel hep sonjal hag hep kaout perz e poaniou Mab-Doue ? Penaos en em savetei, ma vevomp hervez ar bed ? Ar C'horreiz a ra d'eomp mervel d'hon techou fall evit kemer eur vuhez santel, buhez nor Salver Jezuz-Krist.

II. — PENAOS HEN OBER ?

Traou a zo da zilezel ha traou a zo da ober.

Petra dilezel ? Eun dra ha ne dlefe ket beza anavezet : ar *pec'hed*. Deut omp da veza kristenien ken yen ma kredomp ober pinijenn oc'h en em ziwall diouz ar *pec'hed*.

Petra dilezel ? *Hon techou* milliget, orgouilh, koler, kasoni, c'hoant lonka, ebatou difennet, etc...

Petra dilezel c'hoaz ? *Ar c'hig* d'an deveziou merket, hep klask digareziou. Hon tud koz a yune hag a rae vijil e-pad daou-ugent devez dioustu, ha ni, m'hon eus yec'hed, n'hellfemp ket ober daou devez vijil bep sizun, ha yun memes, ma n'eo ket re denn hol labour ?

Petra da ober ouspenn er C'horreiz ?

Pedi muioc'h. Ya, eur bedennig ouspenn bemdez. Ha pedi dreist-holl gant muioc'h a zevosion. *Lenn eul levr mat*, met kentoc'h levr an Aviel. Ober *hent ar Groaz* da wener pe da sul. Maga hor spered gant *sonjezonou santel*.

Pedit, grit pinijenn, en em soursiit eus hoc'h ene : neuze ho pezo graet ho Koraiz, hag e c'helloc'h e gwirionez kana da Bask : *Alleluia !*

DEVERIOU AR C'HRISTEN

ANAVEZOUT DOUE AR MAB

BURZUDOU HOR SALVER

Ret eo d'in ivez beza aketus bras da sellout ervat ouz ar burzudou en deus graet Jezuz-Krist, ouz e viraklou bras hag a ziskouez d'eomp splann ez eo, hep arvar ebet, Mestr war gement tra a zo.

P'edo war an douar, an dud dall a gave ar gweled, ar re vouzar ar c'hleved, ar re glañv ar yec'hed.

Ar re vac'hagnet a veze gwellaet d'ezo. Ar re gwasket gant an diaoul a veze lamet a-zindan e c'halloud.

Ar re varo a save da veo.

Da bevar mil den, hep konta ar merc'hed hag ar vugale, e torras o naon gant seiz baraenn hag eun nebeut pesked bihan. Ha c'hoaz e voe gellet karga seiz paner gant ar pezh a oa chomet.

Da bemp mil a dud, hep niveri ar merc'hed hag a vugale, e roas o gwalc'h da zebri gant pemp baraenn ha daou besk, ha gant an tammou a oa chomet e voe karget daouzek paner.

Bale a reas war lenn Jenezared.

Komz a reas ouz an avel, hag ar barr amzer a dremenas.

Lavarout a reas da Lazar sevel eus ar bez, ha Lazar e zeuas er-maez.

P'edo o vervel, e voe gwelet an heol o teñvalaat ar reier o faouta ; an douar a grenas, ar beziou a zigoras ha kalz a dud varo a zistroas e buhez hag a voe gwelet o vale dre Jeruzalem.

An holl vuzudou-se ha kalz re-all a dle kreñvaat va feiz hag ober d'in anavezout eo holl-c'halloudek Jezuz-Krist evel Doue ha koulskoude ken dister ha ni evel den, pegwir en deus kemeret ha renet war an douar eur vuhez a drubuilh evit deski d'eomp penaos ober hor silvidigez.

DRE FAOT PIOUS EO....

ma 'z eus tud klanv ha na reont ket o Fask ?

Dre faot ar beleg ? n'eo ket !...

Dre faot an hini klanv ? N'eo ket !...

Dre faot pious eta ?

DRE FAOT O ZUD !...

Evit santelaat miz Ebrel

1° — *Bevomp atao er stad a c'hras. Ma c'hoarvez ganeomp koll anezan, na chomomp ket er stad a bec'hed ; deomp rak-tal da gofes.*

2° — *Deomp da gomunia d'ar gwener kenta eus ar miz (d'ar 7) pe d'ar sul war-lerc'h (Sul ar Bleuniou) ; e-pad ar Sizun Santel, dreist-holl d'ar Yaou-Gamblid ha d'ar Sul Fask ; ha ken lies gwech ma c'hellimp.*

3° — *Greomp alies hent ar groaz ha sonjomp gant evez e Pasion Hor Salver.*

4° — *Deomp d'an oferenn bep sul, ...war ar pemdez ivez, ma c'hellomp, ... atao gant eul leor oferenn. — Na vankomp morse d'ar gousperou dre hor faot.*

5° — *Heuliomp gant evez lezenn ar vijil bep merc'hher ha bep gwener eus ar c'horaiz lezenn ar yun bemdez e-pad ar c'horaiz, nemet da sul.*

6° — *Kinnigomp hon oberou da Zoue bep mintin, lennomp bemnoz Buhez Hor Salver Jezuz Krist pe Buhez ar Sent, ha lavaromp da-c'houde ar pedennou asamblez.*

7° — *Karomp hon nesa a-greiz hor c'halon, ha greomp vat d'ezan ken lies gwech ma c'hellimp.*

INTANSION JENERAL AR MIZ : Ma vezo ar gatoliked, dre o buhez kristen, skouer an holl.

INTANSION EVIT AR MISIONOU : Ar peoc'h en Indez evit ar relijion gristen.


PEDENN DA LAVAROUT BEMDEZ : Kalon Sakr a Jezuz, kinnig a ran d'eoc'h dre Galon Dinamr Mari pedennou, oberou ha poaniou an dervez-man, evit rapari an dismegans graet d'eoc'h dre hor pec'hejou hag evit an holl vennoziou hoc'h eus hoc'h-unan, p'en em ginnig war an aoter. — O c'hinnig a ran d'eoc'h dreist-holl evit ma vezo ar gatoliked, dre o buhez kristen, skouer an holl.

« Ma ne zebrit ket va c'horf... n'ho pezo ket ar vuhez ennoc'h.

Hor Salver Jezuz-Krist.

MIZ EBREL 1933

Deizlou	GOUELIOU	Induljansou
1 S	Eus an deiz	
2 S	Sul ar Basion — S. Fransez a Baule	
3 L	T. E. Gondulh ha Yann 1 U	
4 M	S. Benead a Filadelfi 1 U	I. L.
5 M	S. Visant Ferrier	
6 Y	Ofis an deiz	
7 G	Seiz glac'har ar Werc'hez Vari	
8 S	Ofis an deiz	
9 S	Sul ar Bleuniou	A. J.
10 L	LUN SANTEL	A. J.
11 M	MEURZ SANTEL	A. J.
12 M	MEURZ SANTEL	A. J.
13 Y	AR YAOU GAMBLID	J. J. L.
14 G	GWENER AR GROAZ	A. J.
15 S	AR SADORN SANTEL	A. J.
16 S	Ar Sul Fask	J. J. L.
	(O renevez ar brofesion en 3 U)	
17 L	AL LUN FASK	
18 M	AR MEURZ FASK	
19 M	Eus an eizved	
20 I	Eus an eizved	
21 G	Eus an eizved	
22 S	In Albis	
23 S	Sul ar C'hasimodo	
24 L	S. Fidel a Sigmaringen 1 U	I. L.
25 M	S. Mark, avieler	
26 M	S. Klet ha Marsellin PP. Mm.	
27 Y	S. Per Kanisius D.	
28 G	S. Paol ar Groaz	I. L.
29 S	S. Per, M.	
30 S	Eilvet goude Pask — S. Benead 1 U	I. L.



Evit sevel

Iliz-Veur Itron Varia an Teir Ave Maria
kasit ho prof da :

M. LE DIRECTEUR DU Propagateur des 3 Ave
BLOIS (Loir-et-Cher) — c/c 306-10, Paris.

Un bulletin paroissial
pour chaque paroisse
grâce aux combinaisons de « La Vie Chrétienne »
(Edition française et édition bretonne)

Combinaison A

Les adhérents de la combinaison A reçoivent :

1° — Pour un minimum de 120 exemplaires.

4 PAGES de texte paroissial (servant de couverture) et 16 PAGES de texte commun (FRANÇAIS, BRETON DE QUIMPER ou BRETON DE VANNES, SUIVANT LE DÉSIR DE CHAQUE ABONNÉ).

La page 1 de la couverture comporte un CLICHÉ-TITRE FOURNI PAR NOUS (nous envoyer photos, cartes postales, pour faire exécuter le dessin).

Le bulletin est livré PIQUÉ, ROGNÉ et est EXPÉDIÉ PAR LA POSTE à chaque abonné. — Le premier numéro est fourni largement en vue de la propagande, à raison de 1 exemplaire par famille. — Sauf avis contraire, nous corrigeons nous-même toutes les épreuves.

Abonnement : 8 fr. par an.

2° — Pour un minimum de 400 exemplaires.

8 PAGES de texte paroissial et 16 PAGES de texte commun. Les autres conditions sont les mêmes que pour le 1°.

Abonnement : 8 fr. par an.

Combinaison B

Nous livrons sans pagination les 16 pages intérieures de « La Vie Chrétienne » (édition française ou édition bretonne). — Cette combinaison permet au clergé paroissial de faire imprimer ou de polycopier lui-même sa partie spéciale.

Prix : les 50 exemplaires..... 9 fr. franco
— les 100 exemplaires..... 16 fr. franco

Le prix au cent sert de base pour toute quantité au-dessus de ce chiffre.

Envoi sur demande de tous renseignements complémentaires et de spécimens gratuits de bulletins paroissiaux.

Voir au dos les renseignements pratiques pour ceux qui adoptent la combinaison A.

Renseignements pratiques

pour ceux qui adoptent la combinaison A.

1). — Les dessins, photographies, cartes postales représentant l'église paroissiale, les chapelles ou monuments historiques que l'on voudrait voir reproduire dans le cliché-titre de la 1^{re} page, doivent nous être adressés UN MOIS AVANT que ne paraisse le 1^{er} numéro du bulletin. — Nous indiquer en même temps le titre du bulletin.

2° — Indiquer le nombre d'exemplaires que l'on désire recevoir pour le premier numéro en vue de la propagande (*un par famille*).

Combien d'exemplaires français ?

Combien d'exemplaires bretons ?

3° — Le premier tirage est expédié au clergé paroissial, qui en assure la distribution et recueille les abonnements.

Ne pas tarder à nous faire parvenir les abonnements reçus, afin que nous puissions faire faire pour chacun d'eux *une plaquette à adresse*.

4° — Le texte spécial à la paroisse peut être *soit français, soit breton, soit bilingue*, mais il est toujours le même pour tous les abonnés de la paroisse.

Le texte commun seul peut être ou français ou breton suivant le *désir de chaque abonné*.

5° — Ecrire D'UN SEUL COTÉ DE LA FEUILLE ET TRÈS LISIBLEMENT, en formant bien toutes les lettres, SURTOUT SI LE TEXTE EST BRETON, car nos linotypistes ne connaissent pas la langue bretonne et exigent une copie parfaitement lisible. — Nous respectons toujours l'orthographe employée par l'auteur.

6° — La copie doit nous parvenir QUINZE JOURS AVANT que le bulletin ne paraisse.

7° — Le bulletin paraît SOIT LE 1^{er}, SOIT LE 15 DU MOIS suivant les possibilités. Cette date est fixée d'accord avec l'imprimeur.

8° — Tous les abonnements d'une paroisse PARTENT DU MÊME MOIS et sont renouvelables à la même époque.

Cependant on peut recevoir des abonnements à toute autre époque de l'année ; mais dans ce cas, les nouveaux abonnés paient uniquement pour les numéros à paraître, à raison de 0 fr. 60 par numéro.

Exemple : En supposant que l'abonnement parte de Février, celui qui s'abonnerait en Septembre, paierait pour cinq mois (septembre, octobre, novembre, décembre, janvier) c'est-à-dire : TROIS FRANCS (0,60×5).

Le Gérant : G. LE BAYON.